

『日本書紀』26 齊明六年九月癸卯条

九月己亥朔癸卯。百濟遣達率。〈闕名。〉沙彌覺從等來奏曰。〈或本云。逃來告難。〉今年七月。新羅恃力作勢不親於隣。引構唐人。傾覆百濟。君臣摠俘略無噍類。〈或本云。今年七月十日。大唐蘇定方率船師軍于尾資之津。新羅王春秋智率兵馬軍于怒受利之山。夾擊百濟。相戰三日。陷我王城。同月十三日。始破王城。怒受利山。百濟之東境也。〉於是西部恩率鬼室福信赫然發憤據任射岐山。〈或本云。北任叙利山〉達率**餘自進**據中部久麻怒利城。〈或本云。都々岐留山。〉各營一所誘聚散卒。兵盡前役。故以倍戰。新羅軍破。百濟奪其兵。既而百濟兵翻銳。唐不敢入。福信等遂鳩集同國。共保王城。國人尊曰佐平福信。佐平**自進**。唯福信起神武之權。興既亡之國。